

東
華
續
錄

東華續錄

臣周澹蕃恭校

秋七月己巳定革職無餘罪人員槩准捐復例○庚午順承郡王泰斐英阿卒命派散秩大臣一員帶領侍衛十員往奠予祭二次諡曰恭○壬申哈達哈等奏據副都統職銜唐喀祿等報稱護送侍衛順德訥赴哈薩克至濟爾瑪台地方有特楞古特宰桑敦多克告稱我特楞古特部落人七百口及古爾班和卓部落人五百口和克沁部落人五百口俱願投誠懇求遷往阿爾台地方遊牧等語隨將敦多克及古爾班和卓和克沁得木齊二人並奇爾吉斯宰桑送出阿逆所屬十八人一併解至軍營臣等竊思特楞古特等既請投誠移往阿爾台何以潛赴烏梁海形迹可疑因嚴訊

敦多克等供稱伊等起程時與西路大兵交戰敗走途中又掠取玉保所帶馬駝等物殺傷兵丁今投烏梁海意圖搶掠再遣人會合阿睦爾撒納同逃阿睦爾撒納亦會遣達瓦送信古爾班和卓等語臣等卽將宰桑敦多克及得木齊二人並阿逆屬人等俱行截殺隨帶兵八百名疾赴伊等駐紮處乘其不備盡行勦滅古爾班和卓與伊弟正欲脫逃爲察達克所獲訊已供認隨將古爾班和卓及伊眷屬一併正法計獲駝四百隻羊一千四百餘隻馬二百餘匹分給效力官員人等臣等仍領兵前往哈薩克諭軍機大臣等哈達哈等帶兵赴哈薩克路遇古爾班和卓等帶領戶口千餘潛往烏梁海卽派官兵擒獲古爾班和卓等正法其屬人全行勦滅甚屬奮勇可嘉哈達哈著加恩授爲領侍衛內大臣賞戴雙眼花翎車布登扎布著晉封郡王唐喀祿著授爲副都統舒赫德效

力軍營此次亦屬奮勉著賞給副都統職銜扎薩克台吉三都布多爾濟著封授公爵協理台吉策勒布多爾濟著授爲頭等台吉烏梁海副都統察達克著授爲內大臣賞銀一百兩索倫營長卓里雅薩墨藍翎侍衛敦濟勒圖各賞銀五十兩其餘效力官兵哈達哈等查明奏聞交部議敘並著傳諭哈達哈等俟撤兵凱旋時派唐喀祿察達克等酌派兵丁前赴烏梁海將逃散賊眾查辦其首惡鄂木布博博果勒卓輝及達瓦藏布等務期一併擒拿解京正法○甲戌諭軍機大臣等據納穆扎爾奏從前收服業克明安台吉德濟特及察袞屬人等遵旨交與輝特貝子德濟特及扎薩克阿布達什管轄今德濟特見同阿逆逃叛應將伊屬人等酌量賞給輝特德濟特阿布達什其餘請分賞喀爾喀等語此項德濟特屬人自不應照投誠之人一體辦理且伊台吉旣已附賊伊等

聞知不免妄生疑懼轉致滋事納穆扎爾所奏甚是著照所請將此項戶口酌量賞給貝子德濟特及扎薩克阿木達什等各四五戶餘俱分賞喀爾喀等爲奴昨已降旨令輝特杜爾伯特人等遷往各原游牧地方此時如已起程亦卽查出遵照此旨辦理○丙子哈達哈等奏據副都統職銜唐喀祿咨稱聞達瓦藏布至額爾齊斯河與烏梁海博博共謀劫掠隨帶兵五百名派索倫總管鄂博什前往在庫爾圖阿氏爾干拏獲達瓦藏布並收服所屬三百餘人內有阿逆屬下二十八人先行正法將達瓦藏布解送軍營經訊明從逆實情並見在糾眾抗拒大兵緣由遂將達瓦藏布及同行宰桑等八人阿逆所養喇嘛一名俱行正法其餘人等俱照古爾班和卓人等一例辦理擒獲賊人之時和托輝特公多爾濟車登至軍營告稱從前爲賊拘留今始得脫懇求軍前效力諭軍

機大臣等和托輝特公多爾濟車登於伊犁擾亂時力弱被擒賊散之後他人俱已全歸伊獨未出朕意其或順從阿逆苟且偷生不獨身負國恩且實爲眾喀爾喀之辱是以降旨令將軍等擒拏正法今覽哈達哈等奏大兵擒拏達瓦藏布多爾濟車登始得乘閒來歸前此爲賊拘留身經勞瘁甚屬可憫著加恩仍復其公爵令在哈達哈軍營效力行走索倫總管鄂博什帶兵勦殺達瓦藏布甚屬奮勇著加恩授爲副都統○戊寅諭軍機大臣等杜爾伯特輝特人等已降旨令遣往各原游牧地方其扎哈沁人等亦應一體辦理但扎木禪見在軍前無約束管轄之人暫令停止遷移著傳諭哈達哈俟大兵凱旋時卽傳旨扎木禪令其率領屬眾遷往原游牧地方安居樂業副朕體恤伊等之意○己卯諭軍機大臣等阿敏道奏稱綽和爾宰桑恩克博羅特曾集眾鄂拓克令將

遊牧移至珠勒都斯惟得木齊綽克察屢諭不遵恩克博羅特親往責問爲綽克察收害等語綽克察目無法紀務卽拏獲正法以示懲儆恩克博羅特綽和爾宰桑員缺著吞圖布補授吞圖布員缺著達爾黨阿等擬定正陪具奏請旨恩克博羅特性本驕暴朕見時卽加訓諭從前授伊宰桑特以其爲彼處舊人之子至於殘刻屬眾之事諒所不免其所屬人等亦應將實在情形告知圖什墨勒等奏聞請旨乃敢擅自殺害此等惡習斷不可長吞圖布應嚴加約束毋得再生事端前恩克博羅特向哈薩克進兵時詐稱墮馬傷足居心欺妄宜爲屬人所害若能如吞圖布之勇往任事自當承受朕恩著並將此旨曉諭哈薩克錫喇尼瑪等知悉哈薩克錫喇係恩克博羅特之叔恩克博羅特有無子嗣令其查明具奏○諭舒明等奏明噶特宰桑恩克圖屬人色布騰等著暫歸於

扎哈沁遊牧居住如恩克圖親身來投亦照此辦理並將恩克圖解送來京從前鄂勒哲依奏稱恩克圖與阿逆同謀搶掠烏喇特和碩特遊牧今伊屬人色布騰等內附而恩克圖未見前來未知隱匿何處既係附和阿逆之人斷不得任其潛逃著傳諭達爾黨阿等俟凱旋時中途查出拏解來京並傳諭眾鄂拓克等協同搜捕再明噶特舍楞及額琳沁之孫策伯克扎布等至今並未拏獲亦著達爾黨阿等留心查拏其或逃入哈薩克境內此等人非阿逆可比無庸帶兵向索可卽遣人曉諭令其獻出其明噶特屬人著交與沙克都爾曼濟管轄舍楞策伯克扎布屬人著交與鄂勒哲依哈薩克錫喇尼瑪等管轄○庚辰諭漕運總督瑚寶歷任封疆宣力有年前以患病乞假卽命御醫前往診視以冀速痊今聞溘逝所有應得卹典著該部察例具奏尋予祭葬諡恭恪○以張

師載爲漕運總督程景伊爲兵部侍郎

由內閣學士遷

○減河南封邱縣

淤地額徵糧則○癸未諭班第鄂容安靈輟將次到京前已降旨

親臨祭奠並令三品以上大臣齊集用昭優卹二臣臨危致命能

勇決以示遠夷有不貪生苟免之人義烈所著可嘉可憫其靈輟

著准其入城各於本家停設並加恩入祀昭忠祠所有應得卹典

仍著該部察例具奏○丁亥上幸清河至將軍班第參贊大臣

鄂容安喪次賜奠○諭班第鄂容安與薩喇爾一同駐守伊犁當

阿睦爾撒納叛亂之時班第鄂容安捐軀殉節而薩喇爾獨自脫

逃及拏解來京朕親加審訊據稱彼時以賊眾四集恐力不能支

是以帶兵逃出以圖再舉等語朕因其情節尙有應須質對之處

將伊暫行監禁今巴甯阿柏琨等到京質訊之下情節相符並供

出脫逃時將朕所賜花翎拔去是其偷生負國已屬顯然然在滿

漢世受國恩之臣而臨難苟免如此自當明正典刑伊本係厄魯特新附之人不足責以死綏大義今班第鄂容安靈輓已到朕親臨祭奠優予卹典靈輓俱令進城卽著旺扎爾帶同薩喇爾前往班第鄂容安柩前將逆黨阿巴噶斯克什木先行敲耳祭奠令薩喇爾在旁看視夫人孰無死使薩喇爾亦能如二臣之引決就義則今日哀榮之典自當一體同受乃顛越至此使伊稍有人心能無愧乎其阿巴噶斯等俟阿睦爾撒納鞏獲到日一併正法以彰國憲薩喇爾著永遠拘禁將此傳諭中外知之○戊子命隨同班第等陣亡官員查給世職○己丑諭軍機大臣等據納穆扎爾奏青滾雜卜道人至烏里雅蘇台煽惑喀爾喀等情形可疑等語青滾雜卜居心詭詐深可痛恨著舒明等詳細察看此時若已露背叛情形卽會同親王成衮扎布德沁扎布等相機擒拏若尙未生

事端止宜留心防範俟哈達哈撤兵同時再行辦理青滾雜卜遊牧與唐努山甚近其或向唐努山至烏梁海皆未可定著傳諭哈達哈臨期確訪或先派兵豫阻去路再行擒拏毋得任其脫逃再貝勒車登扎布呈稱不能辦理臺務必係青滾雜卜指使著一併拏解來京其臺站事務卽速交親王成衮扎布接續辦理毋致貽誤至哈達哈等自哈薩克同時馬匹不免疲疫舒明等卽豫選馬匹善爲牧放俟哈達哈將到卽解往接續以增兵力並著內閣學士阿桂速赴軍營協同辦理諭喀爾喀王公等曰青滾雜卜原係獲罪斥革之人因其尙知奮勇仍加恩承襲貝勒並授爲喀爾喀副將軍上年從征伊犁加恩封授郡王稍有人心自當感激圖報孰意其深負厚恩實出情理之外伊前同阿逆進兵時聽從指使將巴特瑪車凌之弟諾爾布丹津私行帶同將軍大臣參奏阿逆

罪狀竟敢潛爲洩漏嗣後追擒阿逆退縮阻撓奏請兩路出師五萬方可追緝種種悖謬乖張不可枚舉彼時本應卽行正法朕因念及伊祖博貝舊日勞績特加寬宥以觀後效是以此次辦理烏梁海復授爲參贊予以自新之路伊至烏梁海並未拏獲鄂木布果勒卓輝等卽撤兵而回雖尙有將軍哈達哈等領兵在彼伊卽退回無關輕重但旣爲參贊並不奏請諭旨亦不咨報將軍帶兵擅回律以軍法罪不容誅且捏爲種種浮言煽惑眾聽其心實不可問試思辦理準噶爾一事原爲喀爾喀經理久長之計是以命將興師以期一勞永逸然選派喀爾喀官兵俱經賞給錢糧米石派辦牲隻何次不發給價值而青滾雜卜乃謂喀爾喀以連年用兵爲累是誠何心至於軍行賞罰乃國家憲典所必行達木巴扎布係管理杜爾伯特游牧人員縱令巴朗脫逃諱匿不報額琳沁

多爾濟監視阿逆來京明知其叛逆已露袖手旁觀致令免脫二
人情罪斷難姑容然猶念伊等祖父不忍加之顯戮令其自盡此
而曲爲寬縱國法何在而青滾雜卜乃謂喀爾喀係青吉斯汗後
裔向不治罪此語舛謬更甚如朕宗室中有犯刑章者朕又何嘗
廢法耶至於稍知奮勉如巴雅爾什第桑寨多爾濟及車布登扎
布等則俱優封顯秩賜予駢蕃青滾雜卜來京治罪時本應除其
屬眾削其封爵朕始終眷念伊祖不忍泯其勞績所有貝勒封爵
仍施恩准令額琳沁之子旺布多爾濟承襲朕辦理庶政一秉至
公有功者予之厚恩犯法者斷無姑貸將此曉諭眾喀爾喀王公
等知之○庚寅諭軍機大臣等親王成袞扎布世受國恩深知威
激伊聞青滾雜卜種種狂悖卽移咨納穆扎爾轉奏能念伊父額
駢素日篤誠力圖報效深堪嘉予著賞荷包一對以示優眷青滾

雜卜去歲進京時迎合阿逆種種不法今又擅自撤兵復託言眾喀爾喀以用兵爲累違其詭詐喀爾喀等深受國家厚恩斷不爲伊煽惑已降旨詳悉曉諭青滾雜卜應卽拏解來京治罪朕已諭舒明阿蘭泰等會同親王成衮扎布德沁扎布等審機辦理青滾雜卜乃無足輕重之人第喀爾喀舊臣僕中有似此敗類不可不申明國憲成衮扎布等務宜留心防範毋得洩漏此時如應速爲擒治卽會同眾喀爾喀王公等領兵擒拏否則仍遵前旨俟哈達哈等同時再行辦理○富德奏臣遣瑞綽勒圖扎什保確探兩路大兵信息至濟爾瑪台地方遇哈達哈等已渡額爾齊斯河卽令臣等由阿勒圭前進會齊迅卽帶兵前往俟遇哈達哈時會議將兵丁分隊進發聲息相通協擒逆賊再從前脫逃之唐古忒至散秩大臣烏魯木遊牧內搶掠已爲烏魯木所殺又擒獲與唐古忒

同逃之索諾木達爾扎之子蒙固勒訥默庫二人係額琳沁之女
所生並喇嘛羅布占三濟亦係同額琳沁行走之人見在派員解
至軍營報聞○壬辰諭軍機大臣等青滾雜卜叛蹟已著舒明等
會同親王成衮扎布等領兵擒拏哈達哈自哈薩克同時務宜趨
行會同辦理卽已後期亦可堵禦青滾雜卜逃竄之路更爲妥協
再多爾濟車登亦係和托輝特部落今旣辦理青滾雜卜若不行
告知恐伊反生疑懼著哈達哈留心試看果其人無可疑則將擒
拏青滾雜卜之事明白諭知且告以係青滾雜卜一人之罪與伊
無涉令伊協力擒拏事後尙當格外加恩若不可深信卽無庸告
知並將伊拏送京師哈達哈務宜詳慎辦理○乙未予班第鄂容
安祭葬予班第諡義烈鄂容安諡剛烈

八月戊戌以張映辰爲內閣學士

由太僕寺卿遷

○庚子賞熱河貧乏孀

孤及單身閒散每月銀一兩五錢○壬寅諭軍機大臣等前據舒明等奏喀爾喀貝勒車布登亦撤兵擅回朕意車布登不應爲青滾雜卜所惑今復奏伊在那林喀喇地方暫行駐兵聽待調遣等語看來實非聽信青滾雜卜之言果不出朕所料至伊稱果勒卓輝博博等俱已逃入俄羅斯不必遣兵追逐所見甚是著傳諭車布登卽帶領所有兵丁會同親王成衮扎布等速往和托輝特擒拏青滾雜卜伊係喀爾喀舊人今見青滾雜卜負恩背叛必深爲痛恨務奮力擒拏以雪眾喀爾喀之恥○癸卯命理藩院尙書納延泰往北路軍營○命工部侍郎夢麟軍機處行走○乙巳諭軍機大臣等親王成衮扎布舊任將軍今定邊左副將軍哈達哈撤兵將回著授成衮扎布爲定邊左副將軍哈達哈同時將印信交與掌管成衮扎布接到諭旨卽辦理將軍事務帶兵前往和托輝

特擒拏青滾雜卜舒明阿蘭泰桑寨多爾濟德沁扎布塔勒瑪善等俱著授爲參贊大臣桑寨多爾濟如尙未同舒明進兵卽在彼處會同阿蘭泰辦理馬匹事務○戊申諭軍機大臣等達爾黨阿哈達哈等前往哈薩克擒拏阿逆今天時漸寒馬力亦恐疲乏如阿逆尙未就擒毋庸更爲深入著傳諭一面撤兵一面曉諭阿布賚朕念哈薩克係邊遠部落以一逃人之故大兵久歷其境使伊等不得安居是以暫行撤回以圖再舉達爾黨阿哈達哈等卽將厄魯特兵丁遣回各游牧自行輕騎帶兵速由阿爾台一路前行併力擒拏青滾雜卜其後隊兵丁亦派員帶領陸續而行卽此時青滾雜卜已經就擒亦須帶兵赴喀爾喀各游牧善爲安撫並諭哈甯阿仍遵前旨帶兵數百名前往伊犁會同兆惠辦事○己酉命陝甘總督黃廷桂赴甯夏會同厄魯特貝勒羅卜藏多爾濟接

齊喀爾喀馬匹○庚戌諭軍機大臣等朕命親王成衮扎布爲定
邊左副將軍擒拏青滾雜卜應需人協同辦理伊弟車布登扎布
見在軍營著傳諭哈達哈卽令車布登扎布會同富德帶兵五六
百名速行回至成衮扎布處辦事○諭納穆扎爾照管輝特人等
已回各原游牧見在無事著與德木楚克同赴將軍成衮扎布處
辦事俱著在參贊大臣上行走○諭昨已降旨令達爾黨阿哈達
哈等撤兵會同成衮扎布擒拏青滾雜卜今喀爾喀貝勒車登扎
布復棄其所管臺站而貝勒車布登亦私回游牧伊等係世受國
恩之人乃目無法紀深爲可恨著傳諭達爾黨阿等同至軍營時
將車登扎布等傳齊聽候調遣如少有可疑卽將伊等一併擒拏
治罪○癸丑 上奉 皇太后啓鑒秋獮木蘭○免經過地方本
年額賦十分之三○諭軍機大臣等刑部監禁阿巴噶斯庫什克

什克等本應俟阿逆擒獲時一同正法今已患病垂斃著卽行凌遲以彰國憲○諭據兆惠奏吐魯番回人莽噶里克懇請將伊屬眾編次旗分佐領等語莽噶里克感戴朕恩甚屬可嘉著加恩封授公爵卽照額敏和卓之例編次旗分佐領再宰桑賽齊喇呼得木齊之子阿布濟爾噶爾等將盜竊臺站馬匹賊人擒拏亦屬可嘉著授賽齊喇呼爲散秩大臣賞段二匹阿布濟爾噶爾等賞段一匹銀二十兩以示鼓勵○戊午 上奉 皇太后駐蹕避暑山莊○命章嘉呼圖克圖同內扎薩克王公赴鄂爾坤塔密爾會同哲布尊丹巴呼圖克圖及喀爾喀王公會盟協擒青滾雜卜丹得擅棄卡座臺站○庫車伯克屬下鄂對鄂什屬下阿布都爾瑞色提布阿勒氏及弟鄂多什懇請入覲允之○庚申 上奉 皇太后自避暑山莊巡幸木蘭行圍○諭北路臺站俱經接續其調往

綏遠城及察哈爾兵丁除補設卡座臺站之外餘著俱赴將軍成
袞扎布處會同擒拏青滾雜卜瑚圖靈阿富昌德保哲庫訥阿爾
賓領兵到彼俱著授爲參贊大臣隨同成袞扎布辦事尙書納延
泰親王德沁扎布留駐烏里雅蘇台會同普慶等查出搶掠臺站
人等審明正法○壬戌 上駐蹕波羅河屯行宮杜爾伯特台吉
伯什阿噶什來覲 上召見於行殿賜宴○癸亥諭軍機大臣等
定邊左副將軍成袞扎布及親王德沁扎布感戴朕恩聞逆賊青
滾雜卜背叛卽於眾會盟調集兵丁復令哲布尊丹巴呼圖克圖
曉諭眾喀爾喀等共圖擒賊甚屬可嘉著交部議敘此時成袞扎
布亦毋庸領兵赴納密爾沙扎海會同德沁扎布致稽時日惟應
速行進兵擒拏逆賊並曉諭眾喀爾喀等毋爲浮言煽惑自取罪
戾至舒明阿蘭泰等不能早擒逆賊反致眾人疑懼如巴勒達爾

達什丕勒等屬人俱擅自棄回游牧皆由伊二人辦理不善之故已命納穆扎爾爲參贊大臣協同將軍辦事著成衮扎布將舒明阿蘭泰撤回詢明伊等前後辦理情節據實具奏○甲子諭達爾黨阿哈達哈等奏稱伊等領兵擒拏阿睦爾撒納與哈薩克接戰大勝兩次等語官兵奮勇攻戰連獲大捷甚屬可嘉著將此次效力行走並陣亡受傷官兵交該部查明係內地者照內地之例議敘係厄魯特者照厄魯特之例議敘○諭軍機大臣等據烏里雅蘇台辦事大臣等奏貝勒車登扎布車布登等俱私回游牧等語車登扎布人本庸懦雖私回游牧不過誤聽浮言所致無庸深究惟貝勒車布登係喀爾喀舊人受恩深重乃亦棄其職守擅自逃回情甚可惡著傳諭將軍成衮扎布將車布登拏解來京前會降旨旺布多爾濟令其擒拏青滾雜卜卽將伊承襲貝勒如不卽行

擒獻應與青滾雜卜一體辦理其屬人卽著賞給將軍成袞扎布再貝勒品級車木楚克扎布前在軍營甚著勞績此次接續臺站亦屬奮勉著加恩封爲貝勒管理臺站台吉扎木場因阻止臺站人逃散反被擒執甚屬可憫如何加恩之處著成袞扎布奏聞請旨○乙丑諭軍機大臣等達爾黨阿哈達哈等兩次戰捷奮勇可嘉哈達哈前已賞給雙眼翎達爾黨阿亦著賞給前已降旨令伊等暫撤大兵此時自應接到仍著遵前旨辦理脫逃阿逆皆由策楞王保二人遲誤退縮之罪今王保雖同赴哈薩克並未立功策楞亦領兵繼進皆因接朕屢次訓飭之旨勉強前進初非出於本心伊二人之罪實屬萬無可追著達爾黨阿等由哈薩克回時仍遵前旨將策楞王保拏解來京治罪扎拉豐阿係蒙古人且未經更事其罪尙與策楞王保二人有閒前已革去王爵仍著加恩授

爲貝子公明瑞派往軍前行走迅速此次同達爾黨阿等奮勇行陣甚屬可嘉著授爲副都統額勒登額亦能效自力贖著加恩授爲頭等侍衛

九月己巳哈達哈等奏據貝子達爾扎等報稱邊卡地方見哈薩克千餘人自巴顏山向西前行等語臣等卽派扎薩克三都布等帶兵六百名前往奮擊臣等隨亦帶兵策應共將哈薩克擊敗斬敵百餘人奪其馬匹輜重並生擒五人逐加刑訊供稱見在帶兵迎戰卽係阿布賚其阿睦爾撒納霍集伯爾根等帶兵一千名往尋西路大兵前去阿睦爾撒納自至哈薩克境內我部落內老成曉事之人僉謂阿睦爾撒納爲害四衛拉特歸附 大皇帝今復背叛竄入我地是特移禍於哈薩克若不卽行擒獻恐俱不能安生而阿布賚以阿睦爾撒納如窮鳥投林希圖免死不便遽行執

獻遂與阿睦爾撒納商定令各游牧集兵丁阿布賚先領兵一千至噶哈薩拉克山遇見兵勢甚大心懷畏懼旋爲大兵擊敗前此阿布賚知大兵將至卽將遊牧遷移等語臣等伏思哈薩克眾情猶豫阿布賚袒護阿逆墮其奸計今計敗逃竄阿布賚業已膽破臣等卽行帶兵追逐前進下部知之○達爾黨阿奏臣等帶兵一千名至雅爾拉地方賊眾二千餘人迎戰我兵奮勇殺賊斬賊五百七十餘人生擒十一人中箭帶傷者甚多復追逐至努喇地方餘賊眾二千餘人奮力鏖戰殺賊三百四十餘人生擒十八人內有阿逆宰桑扎南布嚴加訊問知阿逆與霍集伯爾根帶兵迎戰阿逆恐被大兵認識改換藍纓因不能支持大兵卽先遁去又據擒獲哈薩克楚魯克供稱伊兄弟二人向爲阿布賚所信任情願往諭阿布賚擒獻阿逆等語查從前拏獲哈薩克楚爾璘時卽

供稱楚嚕克阿喇勒拜兄弟二人素爲阿布賚倚任臣等卽將阿喇勒拜拘留軍營令楚嚕克於七月十二日起程限十五日令其曉諭阿布賚擒獻阿逆報聞○庚午兆惠等奏上年遣往回城曉諭之侍衛托倫泰至今未回臣等詢問烏什城回人伯克噶岱默特及扎爾呼齊錫克錫爾格等俱稱使人遲久未回回人地方似有事故或布拉呢敦等到彼滋事或中途有布魯特回人生變俱未可定若遣兵赴阿克蘇庫車烏什等處曉諭收服其眾則葉爾羌喀什噶爾回人等聞風震懾等語臣等伏思葉爾羌喀什噶爾各回人若不及時辦理將來或與布魯特會合滋生事端遣副都統銜阿敏道領兵一百名令扎爾呼齊錫克錫爾格帶領喀吉斯珠勒都斯遊牧厄魯特兵三千名同烏什城伯克噶岱默特前往酌於九月十五日起程收服各處回人並採取侍衛托倫泰信息

如阿克蘇庫車等處回人果能恭順每年應納貢賦或令其赴吐魯番向額敏和卓交納或送交伊犁辦事大臣俟到彼處酌定儘敢抗違卽行剿滅報聞○乙亥達爾黨阿等奏臣等擒獲哈薩克楚噶克阿喇勒拜令其曉諭阿布賚擒獻阿逆續經臣哈達哈等擒獲杭吉勒圖昭華什等亦請往諭阿布賚速行擒獻是以將杭吉勒圖拘留釋放昭華什回巢嗣於七月二十七日回至軍營據楚噶克稟稱奉命往諭阿布賚據阿布賚云我等帶兵前來並非敢與大國相敵因尋阿睦爾撒納途聞被大兵擊敗阿睦爾撒納如窮鳥投林擒獻無難懇求 大皇帝開一面之網全伊一命等語昭華什亦同楚噶克前來臣等卽諭知楚噶克等我等欽奉大皇帝諭旨統領兩路大兵擒拏阿逆一日不獲斷不中止今阿布賚等並未將叛賊擒獻反二三其說爲阿逆請命明係爾等緩

兵之計不知反爲爾眾哈薩克招禍復據楚嚕克等稟稱我阿布
賚爲阿睦爾撒納請命亦不過希冀萬一如必責令擒獻豈敢抗
違請再予限十五日我等星夜馳回卽將阿睦爾撒納擒獻不敢
欺罔等語臣等復向伊等曉諭爾等是否緩兵之計我等惟遵

大皇帝諭旨進兵追擒叛賊凡遇爾游牧之處盡行剿滅爲利爲
害爾等與阿布賚宜熟思深計是日仍將楚嚕克昭華什等遣回
臣等公議阿布賚果否擒獻阿逆事屬未定是以仍帶兵前進哈
達哈奏臣等擊敗哈薩克後復派散秩大臣達什車凌副都統職
銜瑚爾起等率兵追趕並派總管鄂博什侍衛奇徹布帶兵隨後
接應臣等統領大兵繼進據達什車凌瑚爾起等報稱追及阿布
賚後隊斬首百餘級獲馬二百餘匹器械百餘件又與阿布賚別
隊之布滋拜等交戰殺賊二千餘人生擒一人獲馬四十餘匹卽

由阿布賚布凌拜逃竄之路往追賊眾已紛紛四散達什車凌瑚爾起等復擊獲哈薩克賊人杭吉爾圖巴圖魯等四名詢知兩日前阿睦爾撒納爲西路大兵擊退兄在逃往呢雅斯圖山中臣等卽帶兵往追四面瞭望並無蹤迹因復詢問擊獲賊人告稱伊等初議在此山據守今看來已歸阿布賚巢穴等語續據鄂博什奇徹布稱至索克地方遇賊二百餘人卽行追擊斬馘八人餘眾俱逃竄等語臣等仍帶兵前進諭軍機大臣等達爾黨阿哈達哈等奏稱遣人曉諭阿布賚責令擒獻阿逆等語阿逆自不能倖逃天網此時阿布賚旣未將阿逆擒獻見在時屆冬寒前經降旨令伊等暫行撤兵恐途中驛遞遲延伊等尚未接到著再傳諭達爾黨阿等仍遵前旨撤兵並將擒獲哈薩克人內釋放一二人回巢令其明白曉諭阿布賚今奉大皇帝諭旨天氣嚴寒暫行撤兵爾等

若不卽將阿逆擒獻明春仍令大兵前來盡將爾部落剿滅撤兵
後達爾黨阿等會同成衮扎布擒罕青滾雜卜及遣哈甯阿赴伊
犁協同兆惠辦事一切俱遵前旨行至厄魯特宰桑巴桑甚著勞
績著加恩補授內大臣賞銀二百兩索倫佐領莫托和里著加恩
補授頭等侍衛賞銀一百兩此次軍前效力人員俱著查明議敘
○丙子諭軍機大臣等喀爾喀等誠於謠言妄行喧播成衮扎布
聞信卽調兵前往撫綏朕授伊爲將軍伊弟車布登扎布數年以
來在軍營頗爲出力朕亦封爲郡王伊弟兄二人皆係額駙之子
誼屬舊姻今伊等辦事奮勉可嘉朕有小公主二人伊弟兄僅有
二三歲子嗣卽指爲額駙俟可送入內地之時卽行送來種痘撫
養其幼子見在幾歲著一併奏聞○丁丑 上駐蹕安巴糾和羅
大營土爾扈特台吉敦多布達什遣使臣吹扎布入貢 上召見

於行幄賜宴○戊寅吏部議准山西巡撫明德奏大同府之豐鎮
通判朔平府之甯遠通判俱係漢人於蒙古語言不能通曉應改
爲滿洲蒙古旗缺辦理刑名錢穀及與四旗交涉事件其大朔理
事通判請裁從之○辛巳諭軍機大臣等庫倫恰克圖道上有匪
賊搶掠商人見令集福德爾森保伊柱等會同車臣汗瑪呢巴達
喇查辦瑚圖靈阿係蒙古人熟知其性著卽前往車臣汗部落會
同伊等總統查拏賊匪至伊弟扎拉豐阿朕近加恩授爲貝子此
際帶兵進剿伊並未前赴軍營心存退縮卽此已不勝侍郎之任
瑚圖靈阿甚屬奮勉扎拉豐阿員缺加恩著瑚圖靈阿補授並將
此傳諭知之○壬午賞成袞扎布之弟扎木參多爾濟公品級○
甲申令輝特人等照杜爾伯特分三班輪年入覲○乙酉諭昨歲
江浙督撫等據士民呈詞籲請南巡朕已降旨俞允後因江蘇所

屬偶被災祲地方各官皆有應辦賑務朕恐伊等因除道清塵之役轉於民事稍有妨誤則殊非朕眷顧羣黎之本意復經特諭停止今據兩江浙省督撫諸臣等合詞奏稱西成有慶臣民望幸賢深懇請於明歲再舉巡幸之典南省民風吏治時廬朕懷茲當歲美人和之候省方觀民入疆考績正可抒朕勤民之隱而高堰隄工告竣後亦當親加察看著允該督等所請於明春時巡至於一切供帳頓次絲毫不以累民地方官承辦差務甯樸勿華從前所降諭旨甚明該督撫等其善體朕心以副朕觀風問俗加惠斯民之至意將此通行傳諭知之○丁亥湖南巡撫陳宏謀奏藩司楊灝於應發買補運江穀價二十萬餘兩每百兩扣銀一兩三四錢及二兩六七錢不等通計侵扣銀三四千兩入己兌驗屬實請將楊灝並庫官周照革職暫委臬司龔舒摘印署事清查庫項得旨

如此察吏何愁吏治不清朕甚爲湖南吏民慶幸而嘉悅焉餘有
旨諭部諭這所參楊瀨周照俱著革職其貪黷侵扣情由及管庫
家人書吏該撫一併查拏嚴審究擬具奏藩司爲通省錢穀出入
之地況買補穀價關繫倉庾乃剋扣短發必致貽累閭閻陳宏謀
能留心體察據實參奏毫無瞻徇甚屬可嘉著交部議敘○以崔
應階爲湖南布政使馮鈐爲貴州按察使

由貴西道遷

○戊子命甘肅

十三府州廳屬各州縣衛十一年至十五年民欠地丁錢糧草束
全行蠲免安西五衛及皋蘭縣蠲免本年錢糧甯夏等府屬十七
州縣本年錢糧免十分之三元年至九年蠲剩未完及十年至十
五年民欠籽糧一併恩免○庚寅 上奉 皇太后駐蹕避暑山

莊○授杜爾伯特親王伯什阿噶什爲盟長貝子烏巴什爲副盟

長○辛卯 上御澹泊敬誠殿受杜爾伯特親王伯什阿噶什貝

子烏巴什吐魯番公莽噶里克之子白和卓等朝○乙未賜暹羅國王清篆印○除廣東番禺等三縣額外歲供米

閏九月戊戌諭軍機大臣等據侍衛端濟布奏稱青滾雜卜遣人至哲布尊丹巴呼圖克圖處懇求代奏寬宥並請移至烏梁海哈喇達爾漢地方居住等語青滾雜卜之罪萬無可追若少可寬宥朕自當格外施恩卽如車登扎布雖聽信青滾雜卜之言擅回遊牧然尙無背叛情形仍派伊所屬兵丁接臺坐卡自可無庸深責至車布登顯與逆賊同謀然其人本屬糊塗且係喀爾喀舊人不忍卽治其罪已令將軍成衮扎布詳加體察再行辦理青滾雜卜種種不法非此二人之比是以降旨擒拏治罪著傳諭哲布尊丹巴呼圖克圖不得聽其懇求代爲陳奏此而可宥國法安在並著傳諭成衮扎布速遵節次所降諭旨擒拏青滾雜卜治罪以昭國

法毋致脫逃○山東孫家集河溢○庚子命山東金鄉等處被水
州縣折賑米價每石加銀一錢○癸卯成衮扎布等奏臣於九月
二十六日抵烏里雅蘇台軍營查閱軍營兵一千有餘綏遠城兵
二千名計閏九月十五以前陸續可到統計兵力已足擒賊臣等
卽行帶領前往仍一面曉諭附近逆賊青滾雜卜之扎薩克等並
和托輝特所屬人等令其協同擒獻又聞青滾雜卜將察達克亦
倫烏梁海人等移入伊附近地方居住必有私相煽惑之事卽移
咨阿蘭泰遣人傳赤倫及察達克子弟等明白開導諭以利害毋
墮賊計再貝子朋楚克公丹拜等所轄烏梁海亦與青滾雜卜烏
梁海連界居住臣復遣親信人往諭剪其羽翼俾此賊窮蹙無歸
自可不日成擒報聞○甲辰諭旺布多爾濟等曰青滾雜卜負恩
背叛種種不法已屢次降旨曉諭旺布多爾濟必無與賊同謀之

事朕可深信昨據貝勒車登扎布屬人告稱逆賊青滾雜卜令遷爾遊牧於附近地方爾雖聽從並非真心附賊等語今大兵將抵和托輝特部落已加恩命爾承襲貝勒如能擒獻逆賊協同大兵擒拏自當加以重賞否則卽帶領所屬及各台吉投至軍營旣可永受朕恩且不墮爾祖博貝舊勳卽青滾雜卜屬人誤聽指使今能棄賊來歸亦一槩免其治罪儻迷而不悟大兵所至必與青滾雜卜一體擒拏治罪爾其熟思深慮善自爲計毋貽後悔○乙巳諭成衮扎布等奏附近青滾雜卜遊牧之台吉等俱遣人告知逆賊煽惑情形見候大兵前進其餘兵丁著納延泰富昌陸續進發務宜聲勢聯絡互相策應俾附近各台吉等早得歸附不受逆賊脅從擒拏自屬更易至車登扎布從前果否與賊同謀尙無實據今據奏稱實係附和逆賊甚屬可惡伊尙遣人告知普慶等自言

其並未附賊飾詞狡詐罪不容誅著卽照成衮扎布等所奏候進兵時一併擒拏治罪其見在遣人前來之各台吉等著成衮扎布等登記俟事竣酌量加恩至扎薩克公多岳特多爾濟旣無子嗣所有屬人見在需人約束伊弟敏丕木多爾濟並未附和逆賊著將多岳特多爾濟公爵加恩卽令敏丕木多爾濟承襲○丙午兆惠等奏據遣往回城副都統阿敏道報稱見在領兵已抵綽魯克特赫地方俟宰桑錫克錫爾格調遣各鄂拓克兵到時卽行前進並稱中途接從前遣往回城侍衛托倫泰報文知托倫泰上年已招降喀什噶爾回人正與葉爾羌回人交戰遇阿逆遣往人將伊等擒去後經布拉呢敦收留今年五月內霍集占到彼卽將阿逆使人殺戮派人護送托倫泰前來惟將副將軍薩喇爾之兄特古斯及同往之厄魯特等俱留彼處據霍集占等告稱厄魯特等人

不可信是以不合回軍營俟奉到諭旨遵行再厄魯特霍勒博斯
宰桑衛徵哈什哈率領屬人六百戶見逃入回城等語臣等卽密
飭阿敏道見在托倫泰已回據所報回城地方並無事故毋庸多
帶兵前往卽令同錫克錫爾格赴彼詳察情形如無抗違之意卽
將回人等加意安撫並約束帶往之厄魯特等毋得肆行擾害所
有回人應輸貢賦查明數目令其交納其應赴伊犁種地回人務
於本年十二月內攜帶牛具前赴所指地方並令回人頭目親赴
伊犁以備詢問諭軍機大臣等兆惠密飭阿敏道前赴回城辦理
事宜甚屬妥協卽照所奏辦理托倫泰著卽令其來京至衛徵哈
什哈帶領屬人逃入回城係從前同古爾班和卓逃竄者此時如
入回城毋庸查究俟收服回人後曉諭伊等擒獻首惡所有屬人
卽行賞給回人爲奴如或藏匿別處者兆惠等應留心防範並卽

派兵剿滅毋使滋生事端方爲妥協○戊申 上奉 皇太后自

避暑山莊回鑾○庚戌諭軍機大臣等成衮扎布奏稱阿桂自到

軍營後辦理諸務甚屬盡心等語阿桂著授爲參贊大臣同將軍

成衮扎布摺剿逆賊務宜加意奮勉以副委任○命借給黑龍江

被水人口籽種口糧○吏部議准山東巡撫愛必達奏查闕里

崇聖祠向由衍聖公委曲阜縣世職知縣致祭今改爲世襲六品

官應令專主 崇聖祠祀事其俸祿歲支二十兩其官與執事官

相同遇有缺出如係進士舉人遇原職輪班應選者聽其就選赴

任其由貢生生員補授有願鄉試者令其一體鄉試從之○甲寅

上奉 皇太后還京師○乙卯命尙書劉統勳督辦東河疏築

事宜○丙辰諭軍機大臣等達爾黨阿等奏請在哈薩拉克過冬

明歲整兵前進一摺伊等辦理一切俱未合宜朕早已料及是以

八月內卽降旨令其撤兵著卽遵照前旨辦理卽如伊等派阿里
衮領兵前進而將軍等並未同行策楞係獲罪效力之人亦不知
奮身前往阿里衮僅率七十餘人遇賊千餘獲其馬匹輜重甚多
設伊等俱能如此奮勇逆賊早已就擒又遣往哈薩克之楚噶克
昭華什等曾否回至軍營奏內並未聲明種種辦理未見端緒殊
負委任之意哈達哈前遇阿布賚並未窮追甚屬畏葸所賞雙眼
翎不准戴用撤兵同時著隨同成衮扎布辦事俟鞏獲青滾雜卜
後再降諭旨從前降旨令撤回兵丁俱由北路行走第恐接濟口
糧稍覺周章見在兆惠又有請留兵駐紮安濟海之奏著達爾黨
阿哈達哈等於所領兵丁內派出一千名交哈甯阿帶往安濟海
駐紮其餘兵丁俱由北路撤回阿里衮富德著先行馳驛來京鄂
寶明瑞額勒登額亦著來京再哈達哈車布登扎布等撤兵同時

路過烏梁海地方並著協同舒赫德擒拏果勒卓輝等正法唐喀祿已令在科布多駐紮同阿蘭察辦理事務舒明亦著馳驛來京至哈薩克錫喇尼瑪吞圖布等連年效力軍營殊屬勞勩著卽傳諭伊等帶領所屬兵丁各回游牧以示體恤○命蒙古謙土准入口售賣毋庸限定斤數○丁巳諭逆賊阿睦爾撒納負恩背叛一事當準噶爾甫經平定之後若留此遺孽恐其煽惑新附之眾是以嚴趣策楞玉保等就去年出征之兵追剿並非別有徵發而逆黨解散阿逆隻身遁逃彼時我師與賊人相距甚近可乘之會甚多而伊二人各懷私見坐失機宜其意以爲追之不及可以自卸其罪及之而不獲則罪滋大此其居心尙可問耶及朕飭催再四西北兩路之兵咸會始見稍振軍聲達爾黨阿哈達哈等遂有嵩哈薩拉克山伊什爾等處之捷阿布資汗巴巴等望風奔潰阿逆

易服潛逃然所獲之楚嚕克等兩次縱回傳諭擒獻卒以限期相誑逾月之久而阿布賚等遂得以其閒移帳遠徙夫自去年平定伊犁逐蠶逆賊以至速捷哈薩克皆賴 祖宗威靈 上天默佑以致成功而朕所用之大臣往往以慎重觀望坐失機宜是朕之咎也又豈肯遂非使師旅勞憊於絕域且馬力已疲而賊蹤益遠非此諸人姑且遷延所能了事是以於八月望前卽特降諭旨令其班師乃達爾黨阿等於未經奉到此旨之先已奏請暫回哈薩拉克地方過冬俟明春再進此不過強爲之詞耳事斷難行仍諭令遵旨撤回雖逆賊暫逃顯戮揆此情勢阿逆窮蹙奔竄之不暇必不能因我撤兵復勾連阿布賚等犯我降番諸部儻竟奮螳螂之臂則伊犁見今料理規模已定兵整糧足厄魯特諸部落傾心向化聽我指揮與去歲情形迥異逆賊到卽成擒此萬萬無可慮

者總之前年辦理準夷原非大舉而機不可失斷自朕心乃數月之閒平定伊犁繫繫酋長完我兩朝未竟之緒此實仰荷上天眷佑朕不敢自以爲功至諸臣之不能奮然爲國家出力顧此失彼朕雖未嘗不早慮及而每以途遙失之事後用是慚憤耳至阿逆中道叛去原於西師全局毫無輕重特已將次就擒而復致颺脫未克卽正典刑然揆之天理人情從來叛賊穴鼠釜魚斷無久延之理如羅卜藏丹津自雍正年間叛入準噶爾越歲二紀昨來仍搜捕得之獻俘闕下亦近事之明徵大驗也况以阿逆之滅倫犯紀如猘犬噬人眾咸切齒其能久逃天網耶其親屬悉早經擒縛而率先助逆之阿巴噶斯哈丹克什木等俱次第解至京師咸已伏法阿逆遠竄窮荒俟一二年後朕再爲相機酌理此時將雖無功而兵勞堪念是用息我師徒暫爲休養所有用兵前後本

末宣諭中外俾共知之○庚申諭明歲南巡江浙兩省各截留運京銅鉛十萬斤鼓鑄漕糧五萬石平糶○甲子諭軍機大臣等前因達爾黨阿哈達哈等效力軍前尙知奮勉加恩賞給雙眼翎以示鼓勵乃西北兩路大兵會合一處反彼此推諉各存意見殊負委任朕念伊等遠行勞苦不卽重治其罪然亦無功可錄達爾黨阿所賞雙眼翎亦著同哈達哈一併繳還不準戴用

冬十月丙寅諭軍機大臣等西北兩路大兵見在撤回已傳諭兆惠酌量派兵往襲阿布賚使賊不得甯處並通飭各鄂拓克防範哈薩克所有此次進兵俘獲哈薩克人等原無得罪天朝之處應酌量施恩釋放回巢俾伊等眾哈薩克咸知感戴自將阿逆擒獻見有旨傳諭阿布賚擇伊等明白曉事者齎往仍加恩酌給口糧其頭目人等並著賞賜段匹兆惠接到此旨卽傳諭哈薩克錫喇

激朕恩情甚誠篤霍集占雖未可深信然其道使遠來明有畏懼
天朝之意此時如已將霍集占拏獲或伊自行投至伊犁兆惠善
爲安撫另派員解送來京若阿敏道駐兵在彼未卽擒獲兆惠亦
遣人至彼將伊遣使前來奉旨准其投誠之處明白曉諭但令其
將每年貢賦照數交納毋庸加以兵威辦理方爲妥協其令回人
前赴伊犁種地一節前已降旨停止著兆惠遵照辦理此次自葉
爾羌回來之侍衛提奇圖目擊彼處情形著卽馳驛來京以備詢
問○丁丑諭軍機大臣等舒赫德帶兵追緝烏梁海果勒卓輝等
至鐙格爾伯勒齊爾地方知果勒卓輝逃入俄羅斯卽將彼此不
容留逃人之例明白曉諭俄羅斯頭目並領兵向彼索取所辦尚
合機宜已令該部移咨俄羅斯薩納特衙門索取果勒卓輝等舒
赫德毋庸領兵前往著將所領兵丁交與哈達哈等帶領此旨到

日卽行馳驛來京仍加恩補授正紅旗漢軍副都統伊子舒常並
著加恩補授三等侍衛○戊寅諭軍機大臣等兆惠等奏稱據綽
羅斯汗噶勒藏多爾濟等咨稱巴雅爾搶掠洪霍爾拜扎哈沁等
五百餘戶殺傷人眾劫奪牲畜已遣和起會同噶勒藏多爾濟等
設計擒拏巴雅爾原係不可深信之人今果肆行吞噬情甚可惡
應卽行擒拏治罪第扎哈沁人等牲畜亦甚無多今據報稱駝馬
牛羊數至逾萬其中尙或有捏飾之處亦不可不詳加體察再鄂
爾奇木濟係扎哈沁宰桑伊等旣被搶掠應由鄂爾奇木濟轉報
將軍辦理仍由噶勒藏多爾濟等咨報軍營亦屬非是噶勒藏多
爾濟係綽羅斯汗若將附近各鄂拓克事務俱歸管轄亦非所宜
嗣後無論何鄂拓克事務俱令徑報將軍方爲妥協從前曾密諭
兆惠防範巴雅爾稍有可疑卽行辦理且因巴雅爾與哈薩克錫

喇係同母異父之子是以勿令知覺其時哈薩克錫喇尙係新降未經受朕厚恩今伊效力軍營甚知感激奮勉且見在尙未抵伊犁兆惠等將巴雅爾擒拏後俟哈薩克錫喇到時仍如從前一同辦理事務不必稍露形迹使伊疑懼○諭兆惠奏阿敏道帶兵前赴庫車等處招服回人因回人見所領厄魯特兵丁不敢出城迎降隨將厄魯特等退回阿敏道親赴庫車城辦理招降事宜等語回人等向懼厄魯特戕害是以未敢前來迎降亦或事之所有昨已傳諭兆惠見在霍集占遣使來京意甚誠篤果能遵諭貢賦即不必加以兵威且時屆隆冬阿敏道所領厄魯特兵丁旣已退回此時霍集占如已親身謁見將軍或遣人前赴軍營立定貢賦章程兆惠等卽遵照前旨辦理○辛巳諭昔日諸王曾經血戰宣力國家諸王之側福晉又皆係滿洲或係蒙古是以定有子祭之例

此後諸王中除賞過側福晉外餘無側福晉者居多經朕降旨視王等爵秩定例於是王等率皆奏請封立側福晉惟是側福晉若與嫡福晉一體予祭殊非體制嗣後王等側福晉薨逝其應否予祭之處繕寫綠頭牌請旨奉旨予祭亦不過致祭一次足矣其用祭文之處著永遠停止○諭軍機大臣等哈達哈等將軍前奮勉之喀爾喀郡王車布登扎布開列具奏已命軍機大臣等酌量伊等勞績分別獎賞車布登扎布巴雅爾什第俱著賞戴三眼翎恭格敦丹著賞戴雙眼翎向例親王不令戴翎以示優異其領兵及隨圍時並著戴翎今親王成袞扎布兒辦副將軍事務亦著帶三眼翎如來京遇大典禮時仍照在京親王體制○癸未命明晟南巡文武官於三十里內迎送○乙酉諭致仕大學士福敏品行端嚴學問醇正老成耆碩宣力年深久侍講帷清勤懋著予告以來

朕時加存問前歲抱疴曾經親往看視賜以醫藥調養就痊方謂精神康健期願可望今聞溘逝實深軫悼卽日朕親行致奠著賞內庫銀一千兩經理喪事所有應得卹典仍著該部察例具奏尋命入祀賢良祠予祭葬諡文端○戊子諭軍機大臣等舒明奏鞏獲青滾雜卜遣往烏梁海之伯勒格等見在解送成衮扎布軍營著嚴加刑訊卽行正法新舊烏梁海等並無一人附和青滾雜卜聽其調遣大兵一到逆賊自可卽日擒獲成衮扎布卽速領兵前往勿少遲疑○辛卯諭軍機大臣等據雅爾哈善等奏稱巴雅爾遣伊護衛德勒登報稱沙克都爾曼濟屬人搶掠伊等所屬馬匹牲隻又伊克商人等亦有將伊屬人戕殺之事因其所報情形未確令其詳查再行辦理等語雅爾哈善等所辦甚是巴雅爾搶掠扎哈沁遊牧經噶勒藏多爾濟等報知副將軍兆惠已派和起前

往擒拏此時和起等如已將巴雅爾拏送巴里坤軍營卽委員押解來京儲尙未拏獲而巴雅爾自知其罪希圖巧爲掩飾或親至巴里坤申訴伊屬人被劫之事著雅爾哈善等明白曉諭伊等皆係受恩封汗之人部內互相戕害事關重大來京面爲陳奏自蒙鑒察伊如聽從卽委員解送來京或推託不行亦卽將伊拏解前來毋令免脫○壬辰諭向來各省鄉試硃墨卷解送到部卽派翰詹坊局以上及京堂科道等公同磨勘所以慎重科場稽查弊竇典至重也其磨勘諸臣不過按數按省分派若不於卷面註明某官某人磨勘字樣以專責成則已經夾籤者尙知爲某人摘出其未經夾籤者或不過虛應故事陽博寬厚之名陰省校閱之煩而盡心乃事者反不無觀望殊失磨勘本意此朕偶因問陳世倌磨勘事而思及者然不戒視成朕所不爲著以下科爲始磨勘諸卷

俱於卷面填寫銜名俟該部彙卷後朕另派人於每束內量取數
卷特交大臣詳悉校勘呈覽朕仍於此中復行抽閱如有草率從
事者卽交部照例分別議處則磨勘各官及特派大臣之是否詳
慎均難逃朕之洞鑒矣著爲例○諭程盛修奏南巡接駕之在籍
官員請限以品級並守制諸臣停止接駕一摺所見非是朕稽古
時巡省方問俗黃童白叟皆得歡迎道左共申愛戴其在籍大僚
夙叨恩遇自當遂其覲光之願卽小臣中疏遠罷斥者旣曾沾一
命亦何至禁阻令不得與齊民齒此與朝儀之定等威以明體制
固不同也雖此等接駕人員不無望恩倖澤之意然在朕自有權
衡上次南巡時亦俱就其罷黜情罪酌量分別聞有棄瑕錄用者
餘或加恩復其原銜或降等給以頂帶未嘗槩得濫邀異數此爾
諸臣所共知共見試問有因接駕復用而劣蹟仍前昭著殃及百

姓者誰乎至於守制諸臣教孝作忠均關至性何曾降旨槩令其必出迎鑾然其中有將屆卽吉之期或林墓之事已畢者而竟閉門不出於心自有所不安卽如親老終養者自應不離親側然里門咫尺而不令一展其葵向之誠乎且此等人員彼各揆時度理卽不能來迎者原未當罪一人也程盛修既有此奏恐外閒無識之徒或未免尙有拘牽之見可將此通行曉諭知之○閩浙總督喀爾吉善奏紅毛番船向收畧門忽自上年來浙臣遵旨與廣督楊應琚商辦見將徵收稅課及稽查事宜比較則例設立條約並嚴禁勾引夷商從中漁利得旨浙省止有較粵省重定稅例一法彼不期禁而自不來矣此非言利宜知之

十一月乙未成袞扎布奏據哈達哈咨稱見在擒拏青滾雜卜先道多爾濟車登馳驛前赴軍營其可否遣同遊牧之處聽臣等的

議查多爾濟車登之弟及妻子所屬人等見與逆賊同居並有謠言多爾濟車登已正法者今聞格外加恩仍封公爵所屬人等自必倍加感激應令伊速回游牧曉示利害如能擒獻逆賊奏請加恩儻敢黨同進兵一併擒拏治罪報聞○丙申孫家集合龍○丁酉上幸履親王第視定太妃疾○辛丑諭鄉試磨勘一事前已有旨令於下科爲始將來詳加覆勘自不致視爲具文惟是三場試藝篇幅繁多士子風簷寸晷中檢點偶疏輒干指摘其以磨勘獲咎者轉得有所藉口且設科立法程材無取繁文虛飾今士子論表判策不過雷同勦說而閱卷者亦止以書藝爲重卽經文已不甚留意衡文取士之謂何此甚無謂也三場試以書藝經文足覘素養繼之五策更可考其抱負之淺深又何庸連篇累牘爲耶嗣後鄉試第一場止試以書文三篇第二場經文四篇第三場

策五道其論表判聚行刪省至會試則既已名列賢書且將拔其尤者備明廷制作之選淹長爾雅斯爲通材其第二場經文之外加試表文一道卽以明春會試爲始鄉試以己卯年爲始著爲例如此則士子闔中不得復諉之於日力不給而主試者亦可從容盡心詳校無魚目碣砭之混且鄉試第二場止經文四篇斯潦草完篇者當在所黜專經之士得抒夙學而後陋者亦知所奮勵去浮文而求實效斯足稱國家寶典大典可傳諭該部遵行再向來會試例不磨勘未足昭慎重亦著寬至庚辰春榜後奏請一體派員磨勘○戊申定八旗兵丁衣甲式毋用鐵葉繡花○己酉諭謝溶生奏請將州縣才力不及題請改教之例停止一摺此所謂知其一不知其二也定例州縣改補教職者原以牧令身膺民社非精明強幹之員不克勝任其或才具平庸難勝司牧之任而出身

科甲年力未至龍鍾若遽行廢黜則在彼初無顯過是以畀之司鐸之任令得自效亦國家愛惜人才因材器使之意初非以訓迪士子之官爲庸才養老計也迨改補以後儻有因循曠職蕩檢踰閑者在學政原可隨時糾劾今該學政乃謂該員一經改教職業皆廢弛不理是不思甄別教職爲學政分內之事轉若題請改教之員學政竟無可如何者是何言歟至如該學政所請州縣才力不及降補佐貳之處佐貳乃屬地方官凡公事差委尤非拘迂者力所能辦若其人坐而督課尙慮不能而顧令效奔走之勞冀收臂指之益斷無是理所奏不可行仍通行傳諭知之○命安徽浙江山東河南撥銀一百六十萬兩於江蘇備賑○庚戌諭軍機大臣等黃廷桂所奏調解安西馬匹摺內有行文甘涼等處俟其到時沿途分撥則皆知爲補缺之馬不致啓人疑議等語此亦何疑

議之有豈黃廷桂尙未深悉此事機宜耶阿逆之負恩逃竄罪在
必誅以國法論之固不得不極力擒追用示顯戮以事理論之尤
不得不深籌勦獲永絕根株前此降旨撤兵不過暫令休息俟一
二年後再爲相機酌辦其實一切進剿事宜仍當及時籌備若竟
任其遠颺必致終貽後患况準噶爾一事實 皇祖 皇考未竟
之緒仰承 上蒼默佑適值事有可乘今伊犁二十一昂吉皆隸
版圖豈可留此遺孽撓我已成之功致貽將來之患阿逆從前尙
不過孑身遠颺雖意其必將煽惑哈薩克以圖狂逞而勢難驟合
不妨徐爲之圖今據順德訥所奏則阿布賚已妻之以女假之以
眾黨羽盤結其必不能忘情於伊犁已可槩見且以阿逆之窮兇
極惡反覆狡詐將來亦安知不吞噬阿布賚而悉奪其眾愈致滋
蔓難圖是叛賊一日不獲則伊犁一日不安邊陲之事一日不靖

大臣以體國爲心俱應籌辦及此至用兵之費雍正年間西北兩路費至五六千萬今自用兵以來統計軍需纔及一千七百餘萬卽更有多費而窮此兇頑永救荒服朕亦何惜今所慮者不過馬不足用甘肅一省屢經調撥缺額自多見今直隸購買五千匹已降旨全數解往將來卽再有需用之處自當豫爲籌畫正不必以此鯁鯁過計也朕非舍逸好勞務勤遠略良以揆機度勢斷無中止之理旣已事在必行自當明切宣諭俾眾共曉然於一勞永逸之意所有辦理軍需事宜屆時另當降旨黃廷桂令其來京而諭著將此先行傳諭知之○辛亥諭莊有恭據報丁憂其江蘇巡撫員缺著愛必達以河道總督署理巡撫事務時屆冬令修防事簡劉統勳卽可交印於愛必達回京辦事莊有恭著給假百日回籍治喪於伏汛前到淮署理江南河道總督事務至大臣奪情任事

本非朕意但一時未得其人且總河非地方官可比從前嵇曾筠任河督時曾經在任守制今不得已權宜委任實朕用人之苦心也山東巡撫鶴年尚未據報起程未到之前著楊錫綬前往暫行署理○諭軍機大臣等達爾黨阿等遣哈薩克楚魯克昭華什等向阿布賚曉諭而留阿喇勒拜杭吉勒圖於軍營爲質乃並不加意防守以致先後脫逃續經拏獲杭吉勒圖又不卽行正法仍復疏縱辦理實屬玩誤達爾黨阿及軍營參贊大臣等俱著交部嚴加議處○以范時綬爲戶部右侍郎原任江西湖北巡撫○湖北巡撫張若震卒予半葬○調盧焯署湖北巡撫陳宏謀爲陝西巡撫圖爾炳阿爲湖南巡撫以蔣炳署河南巡撫服闋日實授蔣炳原任河南巡撫○甲寅諭策楞身爲將軍將前隊之兵委棄而回是阿睦爾撒納明係伊所縱放非尋常之罪可比著將策楞卽行拏問牢固看守解送來

京其定西將軍印信著達爾黨阿管理兆惠已授定邊右副將軍
卽將定邊右副將軍印信送交兆惠管理又諭前因玉保並未力
追阿逆卽行撤兵罪不可宥曾降旨拏解來京嗣因玉保遵朕訓
飭之旨卽赴哈薩克地方途遇賊匪互相爭戰朕特加恩免其治
罪並賞給頭等侍衛不料玉保至哈薩克地方並未擒拏阿逆亦
無奮勉出力之處從前疏縱賊匪之罪與策楞同著仍拏解來京
治罪至扎拉豐阿前赴哈薩克朕曾降旨封公後又封爲貝子今
扎拉豐阿旣已深入乃接奉諭旨竟行退回伊蓋見事勢難成故
藉此以爲自全地耳似此遷延觀望殊屬負恩著降封爲公○乙
卯諭軍機大臣等成衮扎布等奏稱前往曉諭青滾雜卜侍衛巴
圖孟克及曉諭旺布多爾濟之羅卜藏阿扎喇等同至軍營告稱
和托輝特人等皆知青滾雜卜負恩叛逆並不附從青滾雜卜見

帶兵前往托濟烏梁海等語成衮扎布派員先往曉諭辦理甚合
機宜著賞給荷包鼻煙壺以示優眷侍衛巴圖孟克著有勤勞著
賞給副都統職銜並賞銀一百兩羅卜藏阿扎喇等俱著賞戴孔
雀翎和托輝特人等既知大義不附逆賊青滾雜卜隨從不過四
五十人此時或已被旺布多爾濟擒獲亦未可定著卽行進兵剿
捕並曉諭烏梁海等協同擒獻逆賊卽可指日就俘至所奏圖布
慎赤倫明噶特特楞古特所屬人等至克木齊克論竊牲隻請旨
各遣回游牧等語此時阿逆尙未就擒伊犁地方亦多匪竊若遽
將此等人遣回勢必互相搶奪殊屬未便計其人數無多或分給
喀爾喀等爲奴或陸續解至察哈爾安插著成衮扎布酌量辦理
○命侍郎裘曰修赴西路軍營○丙辰諭軍機大臣等昨據雅爾
哈善等奏布庫努特得木齊多爾濟等告稱哈薩克錫喇尼瑪等

貢恩謀叛見擬領兵搶掠巴里坤並擒拏噶勒藏多爾濟等語朕
尙疑爲未確降旨諭雅爾哈善李繩武等帶兵訪查會同兆惠相
機辦理適又據和起遣人告知巴雅爾哈薩克錫喇尼瑪莽噶里
克等同謀爲逆情由事已屬實厄魯特等似此辜恩背叛必應盡
行剿滅雅爾哈善等毋庸領兵前進第宜安輯巴里坤地方毋令
眾心搖惑並派兵加意防守著傳諭哈達哈卽由北路軍營馳驛
來京面聆訓示再往辦理哈達哈所領索倫兵丁見留烏里雅蘇
台著博勒奔察前往帶領由阿濟必濟一帶速赴巴里坤聽候調
遣軍行需用馬匹著黃廷桂速行解往雅爾哈善等應卽選精兵
二三百名馳赴兆惠處告知見在情形並令兆惠卽率所部兵丁
回至巴里坤沿途遇背叛賊人悉行剿滅儻哈薩克錫喇尼瑪等
並未與巴雅爾同謀或旋行改悔自陳罪狀雅爾哈善等卽善爲

慰諭派委妥員解送來京再沙克都爾曼濟等見在巴里坤居住其情形如何亦應詳加體察如無別情卽派伊等同往剿賊儻稍有可疑亦當乘其不備先行剿滅雅爾哈善等務宜詳慎辦理○召何國宗回京○丁巳以博勒奔察爲內大臣同侍衛順德訥赴巴里坤軍營○命甘肅巡撫吳達善赴巴里坤督辦軍需○戊午大學士管陝甘總督黃廷桂奏扎薩克公額敏和卓呈稱奉將軍和起檄調兵四百名於十一月初一日由魯克察克起程隨同將軍行走初六日莽噶里克尼瑪等率兵搶掠將軍和起被圍莽噶里克向眾厄魯特言額敏和卓原係回人暫令回至魯克察克莽噶里克隨遣人令其赴吐魯番額敏和卓不甘從賊託病未往又據哈密副將祖雲龍稟稱貝子玉素布接額敏和卓來信知莽噶里克背叛情形莽噶里克之子白和卓見在內地適於是日由京

抵哈密未便遽令回巢見在拘留防守諭軍機大臣等據額敏和卓具報莽噶里克背叛情形甚屬可惡著傳諭雅爾哈善等卽選派妥員前往曉諭額敏和卓伊係輸誠最久之人感激厚恩朕甚嘉予伊身在賊中實深軫念見在甫從瓜州遷至彼處諸務未經整理豈有擒拏逆賊之力如能誘擒莽噶里克固屬甚善俟奏凱後其地方悉交伊管轄儻力有不能惟將駐紮地方嚴加防範靜候內地大兵前往卽可戡定見已調集各路兵剋期前赴著額敏和卓遵照辦理至祖雲龍將白和卓羈留防守甚合機宜著傳諭黃廷桂遇有總兵缺出卽行請旨補授○庚申諭前據兆惠奏綽羅斯汗噶勒藏多爾濟報稱扎哈沁遊牧牲畜駝馬爲巴雅爾搶掠隨令和起帶兵一百名及回人莽噶里克額敏和卓兩路兵丁並檄調厄魯特兵前往擒拏續據雅爾哈善奏和起兵駐闡展時

尼瑪等所帶布魯古特杜爾伯特扎哈沁兵丁約一千五百餘名
竟至操戈相向而莽噶里克之兵亦遂從後鼓譟以至和起僅率
親隨百餘人徒步轉戰身帶重傷觀此則是伊犁地方又生一事
端矣貪殘好亂反覆狡詐固屬準夷常性然亦由阿逆未經擒獲
之故昨降旨黃廷桂所謂叛賊一日不獲則伊犁一日不安邊陲
之事一日不靖者正爲此耳見在巴里坤地方已經添駐重兵以
資彈壓並派調索倫察哈爾吉林等兵迅速前往協力擒捕其二
十一昂吉中如有爲其煽惑妄思蠢動者則移兵進剿以安反側
而靖荒服夫準噶爾夷眾本非勁旅前歲平定伊犁時偏師直入
業已所向披靡今該地又經阿逆蹂躪之後凋敝已極大兵所至
自可計日戡定尙屬易於經理之事特外間無識之人又不免妄
生議論必謂此事原不當辦卽經辦矣仍復生變何如不辦之爲

愈殊不思準噶爾之爲西北邊患自有明迄今垂四百餘年我

皇祖 皇考當噶爾丹噶爾丹策零等藩籬完固兵力強盛之時

尙且屢申撻伐以爲邊陲久安之計朕仰承 鴻緒上荷 天庥

適值該夷部落擱離人心渙散之後旣已機有可乘而乃安坐失

之豈不貽笑於天下後世亦何以上對 皇祖 皇考在天之靈

耶此所以熟籌審計實有萬不得已之苦心非一時之好大喜功

開邊釁而勤遠略也若謂此事本不當辦則當車凌等先後款關

時卽應拒而不納然伊等窮蹙來歸而竟絕之境外在車凌車凌

烏巴什等庸懦之人尙不過失意而去竊笑無能至阿逆兇暴殘

忍旣已無所歸依必致搶劫滋事其擾害於我喀爾喀諸部又不

知作何景象矣其究亦必至於用兵則與其用兵於投誠之人何

如因勢乘便俾得返其游牧而各安生計乎至阿逆之負恩逃竄

則又伊之自外生成非可逆料不得歸咎於從前辦理之非矣然
朕辦理始意亦惟欲按其四部分封四汗眾建而分其勢俾之各
自爲守以奉中國號令聊示羈縻而已乃伊等蠢愚無知不能承
受太平之福以致自干勦戮實非朕之本懷豈此中實有天意故
非人力所能與耶况該夷地近西陲雖定以疆界准通貿易而犬
羊之性久之亦難保其不生費端今卽重煩兵力得以永靖邊圉
揆之事機尙應斷然爲之豈有已成之功轉爲棄置之理至於用
兵之費雍正年間西北兩路費至五六千萬今自軍興以來統計
軍需纔及一千七百餘萬將來卽更有多費較之曩時終屬減省
亦何惜焉朕於此事並非舍逸而好勞實由於事勢之不可已况
人君日理萬幾國計民瘼實深乾惕宵衣旰食自是分內事亦不
專因軍書旁午而始時慮憂勤也和起效命疆場捐軀報國忠節

可嘉深爲憫惻著照傅清拉布敦之例加恩贈卹並將此通行曉諭知之○大學士管陝甘總督黃廷桂奏前奉旨解馬五千匹內安西馬一千匹已於十一月初旬先後起程計此時已抵軍營陝甘兩省滿漢各營馬尙有四五萬匹實可揀選三萬匹已檄飭加緊飼餒並不時差員查看務期臙壯適用但陝省各營距肅遙遠按站須五六十日若趕送又易致疲乏請將陝省滿漢營馬先調來甘陸續行走甘後分撥涼甘肅各營交州縣官加意餵養陝省摘缺之數應聽自購至駝隻前於歸化城採買一千經晉撫委員運送但趕解亦恐疲乏應令該撫再於晉省各處購二三千隻每有數百隨起分解得旨甚妥又奏回人莽噶里克與厄魯特等潛謀叛逆經雅爾哈善等將莽噶里克之子白和卓嚴拏拘禁查哈密與吐魯番毗連厄魯特及回人等貿易在巴里坤哈密往來

出入者甚多恐潛通信應派兵嚴防哈密雖有防兵二千名巴里坤亦有防兵一千餘名第各項差委外存城無幾已密札安西提督傅魁選兵添駐哈密巴里坤各五百但兵數尙少若再向內地甘涼肅各營徵調必至張皇查有派赴巴里坤種地官兵五百名及塔勒納沁種地兵二百名原議明年二月起程今令先行前往防守再晉省解到駝隻出關未久若趕赴軍營又須撥兵防護已截留安西一帶牧放續調馬匹未至軍營者見咨商雅爾哈善等於附近哈密和暖地方截留餵養將來一有需用即可調往而此時不卽趕赴軍營亦可省撥兵防護之煩得旨此皆朕降旨命卿辦理之事而卿早已慮及不候旨到而已辦理矣若皆似卿如此明決擔承則軍營何至有此不虞之事耶嘉悅之至筆不能宣餘有旨諭○辛酉諭黃廷桂經理軍務籌畫精詳一切調度甚合

機宜大臣能如此明決擔承實心體國深可嘉悅著賞給雙眼孔雀翎並加賞騎都尉世職令伊子承襲雅爾哈善吳達善等宣力軍營實心辦事雅爾哈善著賞給內大臣職銜吳達善著賞給孔雀翎以示獎勵○壬戌王安國因病解任以汪由敦署吏部尚書趙宏恩署工部尚書何國宗署左都御史○癸亥諭軍機大臣等莊有恭所奏泰興縣捐職州同朱昉捐銀贖罪一案此事殊不明晰朱昉既從重歸於毆死顧五案內應擬絞監候卽據家屬呈請亦應俟題結覈擬再行據情奏明飭部定議豈有未經具題遽行准贖之理是外省督撫竟可虛擬罪名飭司擬贖自行完結不必上聞矣從來無此理也乃莊有恭於此案並未具奏竟收其捐項又以交銀未足發縣勒追而奏摺中許多隱躍其辭竟至不能解莊有恭辦事不應糊塗至此看來必有別項情節且上年江省紳

士隨處捐賑乃敦睦桑梓樂善好施之誼並非有罪可贖若朱昉以煮賑爲名贖纒首重罪則江省眾紳士豈皆有罪耶且稱該縣有借動之項見不無虧缺此又何謂耶此案尹繼善若有所聞自應卽時參奏何以並未奏及著將莊有恭原摺鈔錄傳諭尹繼善愛必達將此案緣由秉公據實詳悉查明卽速具奏尹繼善於此等處朕實不能保其必無周旋迴護之處然不肯舍己從人亦朕所深知且愛必達必不敢隨同蒙混也○命江南浙江各截留漕糧五萬石備用

十二月己巳諭據雅爾哈善等奏稱策楞玉保由西路軍營解途間遇厄魯特賊眾被害等語從前令將策楞玉保解來京特以伊等身係將軍參贊大臣專任擒拏阿逆之事乃各懷私意並不勇往向前卽如達永阿自阿逆處脫出卽向玉保言阿逆相離

僅一日程途趨行卽可追及王保理應速行前往乃並不追趕止
令達永阿轉告策楞以卸其責維時策楞與玉保相距亦僅隔一
程而策楞又託言無馬置若罔聞徑回伊犁兵丁馬匹卽使難得
策楞豈亦無乘騎之馬且使果無馬匹又何以將哈薩克錫喇遣
往而伊等又何以返至伊犁耶其意蓋以不能追及阿逆罪尙可
諉若追及而不能擒獲則罪滋大是以如此故爲推卸任其遠颺
其心尙可問乎如伊等彼時以去賊不遠奮勇直前卽使不獲成
擒朕必自有曲諒乃伊等已得逆賊實信反心存觀望坐失機宜
至今逆賊免脫情罪顯然矣朕前降旨將伊犁解來京蓋欲審明
情節通行曉諭明正其罪今策楞玉保俱於途次遇賊被害在二
人俱身獲重罪固無足惜然使將伊等解京審明情節旣可以顯
彰國憲亦可使共見朕心今伊等惡孽滿盈致干天譴死於亂賊

假使伊等不如此推諉能擒獲逆賊受朕何等重恩不然使伊二人果悉力追捕卽不能擒獲逆賊而身亡戰陣朕亦必加以優卹同爲一死視今日之爲賊所害者爲何如耶此皆不以國事爲重挾私誤公爲天所惡之所致也著將此通行曉諭至同時被害解送策楞玉保之官員兵丁雖與陣亡者有閒然因公差遭遇賊身亡殊屬可憫著交雅爾哈善等查明交該部將如何恩卹之處議奏○辛未諭軍機大臣等據成衮扎布奏稱逆賊青滾雜卜逃往齊斯吉特地方已派納穆扎爾領兵追擒不日卽可就縛等語成衮扎布辦理勇往俟擒獲逆賊時加恩優敘至哲布尊丹巴呼圖克圖於青滾雜卜煽惑眾喀爾喀時卽齊集各部落王公等申明大義曉示利害俾不爲逆賊所惑深堪嘉予著晉加敷教安眾喇嘛名號賞給段匹派侍衛黑達色齊往以示獎勵其車登扎布車

布登等與賊同謀應一併治罪著於擒鞏青滾雜卜後俱解送來
東候朕降旨○壬申諭據盧焯奏接奉廷寄新任巡撫陳宏謀諭
旨二道卽一面先行籌辦一面專差齎遞等語所辦甚合機宜封
疆大臣本不當存彼此之見若以已經調任遂謂與己無涉或拘
泥以爲非所當與皆非實心任事之道盧焯能知大體實屬可嘉
至所奏糧餉卽就陝省見貯倉穀內動撥無庸歸化城等處運補
旣省腳費且於晉省邊儲有益亦得緩急輕重之宜盧焯以京卿
署理撫篆至陝後未見有所作爲因軍需事重恐不勝任故改調
湖北今以辦理此事觀之尙克副委任著加恩實授湖北巡撫○
諭軍機大臣等彭家屏稟覆朱吡贖罪一案情節著鈔錄分寄尹
繼善愛必達閱看至此案該督撫等奉到前旨想已見在查辦著
將查辦情形卽行據實奏聞尋奏臣等馳至蘇州遵將巡撫衙門

案據細閱並據升任按察使許松佶稟稱莊有恭曾論朱聃因顧五圖姦止令毆打不令毆殺而顧五係朱聃僕人梅二雇工亦與常人有閒但平日爲富不仁今既願罰留爲該地方公用以快人心俟完銀之日奏明後該犯陸續完銀一萬六千兩尙未完銀一萬四千兩松佶曾經請示莊有恭云若先奏准免罪恐朱聃視爲罪已邀免銀仍拖欠致蹈欺罔必俟全完方可入奏值丁憂始奏請交新任接辦此係具奏遲延之實情等語再四窮詰矢口不移臣恐朱聃別有營求請託情弊見在飛飭泰興縣速將案犯朱聃及弟朱煦解省親審有無別情據實另奏得旨此案始末許松佶必知之甚詳著解任嚴審汝等若於此案稍涉瞻徇了事試思朕爲何如主也又批有如此悖謬之事而總督尙在不知之理乎且此事汝等所審甚遲尹繼善必俟愛必達共審是又何心速行奏

來○定宗室每旗總族長二員○丙子命圖爾炳阿仍留河南巡

撫任以蔣炳署湖南巡撫○丁丑以唐喀祿爲理藩院左侍郎

都統○戊寅諭據定邊左副將軍親王成衮扎布等奏稱參贊大

臣納穆扎爾帶兵追捕叛賊和托輝特青滾雜卜於十一月二十

八日追至俄羅斯交界杭哈獎噶斯地方擒獲見在派委官兵押

解來京等語和托輝特青滾雜卜乃喀爾喀部落之人自其祖父

以來世受本朝厚恩卽此次用兵準噶爾亦專爲保護伊等遊牧

久遠之計伊旣奉派出師自應倍加奮勉力圖報效乃與阿逆私

相交結竟自軍營逃歸伊部將所有卡座臺站悉行撤回復敢散

布謠言多方引誘朕早洞鑒伊一人負恩背叛不過自取誅滅其

眾喀爾喀等必不致爲其煽惑但此等逆賊若不卽行擒拏伊得

竄身遠颺致稽顯戮亦何以彰國憲而昭炯戒耶是以卽命親王

成衮扎布仍爲副將軍董眾討罪而親王成衮扎布奉命進勦實心協力迅速奏功深屬可嘉親王成衮扎布著加恩賞給黃帶封伊子一人爲世子以獎忠勤參贊大臣納穆扎爾帶兵追擒一聞逆賊所在疾馳前進力爲擒獲不致免脫甚爲勇往出力著加恩封爲一等伯爵世襲罔替其在事大臣官員及蒙古王公台吉等俱著交部從優議敘所有隨帶官兵及報信人等俱著查明報部分別獎賞可將此通行傳諭知之諭喀爾喀王公等曰前因逆賊青滾雜卜貢恩叛逆散布謠言爾喀爾喀王公等閒有擅回遊牧者經朕降旨宣諭爾等旋知悔悟各奉職守不致墮賊術中今逆賊已經擒獲其前此黨同附賊人等應分別治罪以彰國法第念喀爾喀王公等爲國家臣僕百餘年誤聽浮言致干罪戾並非有心附賊俱著加恩免其查究嗣後益宜仰體朕恩滿滌前愆約束

所屬各安本業永受太平之福儻再罹法網朕亦不能曲爲寬宥勉之○辛巳諭軍機大臣等據黃廷桂奏稱額敏和卓遣子素賚璠至哈密請兵救援伊保護遊牧與賊相拒靜候大兵前往等語額敏和卓拒賊固守甚可嘉予著加恩封授貝子伊子素賚璠著賞給公品級以示獎勵見在傅魁已赴哈密馬得勝亦陸續領兵至彼卽著傅魁選兵五百名帶同素賚璠馳赴額敏和卓遊牧應援務將莽噶里克設法擒拏儻兵力不足卽著額敏和卓帶領屬人同傅魁回至哈密俟大兵到彼再行辦理○命山東魚臺縣城改建高阜以工代賑○壬午予故甯夏將軍和起祭葬加贈一等伯諡武烈入祀賢良昭忠二祠子和隆武襲一等子○癸未命唐喀祿阿桂同郡王品級車木楚克扎布駐科布多舒明阿蘭泰同親王成衮扎布駐烏里雅蘇台○甲申諭阿逆自伊犁脫逃時策

楞身爲定西將軍玉保係參贊大臣與賊相距甚近乃畏縮推諉以致該逆遠遁原欲拏至京師審明情節明正其罪詎意伊等俱於途次遇賊被害今扎拉豐阿到京伊原係定邊右副將軍續改授參贊與策楞玉保同事因將策楞玉保疏脫阿逆各情節面加詢問據伊奏稱玉保前進時卽慮及不能拏獲阿逆向策楞商問策楞令伊先行隨後卽領兵策應後知阿逆已經免脫彼時營內止餘四五日兵糧馬匹亦少諒力不能追及是以回至伊犁等語玉保係領兵追捕之參贊大臣理宜竭力奮勇務期必獲乃於未去之先豫存退縮觀望之意其不肯勇往前進已可槩見至策楞身爲將軍當聞阿逆免脫時自宜兼程追捕豈有反置之不問復回伊犁之理其意蓋以追及阿逆而不能成擒獲罪滋大若僅不能追及罪尚可諉其居心不良朕早已洞鑒又以拏獲額琳沁爲

足以委卸其罪不復奮勇前進卽以額琳沁而論伊係阿逆黨羽年已衰邁設欲用彼力以擒阿逆則當用計安慰如無可用之處應卽行正法收其遊牧以濟兵力外此更無他策而策楞等心懷怯懦不敢犯其遊牧復將伊誘至軍營詐稱擒獲實屬無恥再烏勒登乃領隊大臣與策楞玉保同在軍營經朕召伊來京面詰據稱聞阿逆脫逃之信卽請發兵五百追擒玉保策楞俱以伊妄希僥倖置之不理後伊隨同玉保前進復請兵追擊玉保止發兵五十名伊同額勒登額追至庫爾默圖嶺僅餘二十八人所騎駝隻又俱疲乏而阿逆於伊起行之日已經過嶺竄入哈薩克境內等語詢之扎拉豐阿據稱屬實覈其情由阿逆初時之得以遠颺者皆由策楞玉保等存心不良罔顧國事互相推諉所致至於此次兩路進兵哈薩克追擒阿逆當分兵各進時尙知奮勉迨至兩路

會合每至抵牾更由伊等心存畛域不以國事爲重以至辦理一切俱失機宜種種悖謬不勝枚舉又覈計其由哈薩拉克至伊什勒春集地方進兵時行走至五十日迨至撤回則又甚速是追擒逆賊反從容緩進如彼撤兵回日又迅速過行如此所謂勤勞王事者固如是乎至於兩路大兵屢敗哈薩克之後揀選兵馬前往擒拏阿逆時北路派出喀爾喀郡王車布登扎布西路派出阿里衮彼時達爾黨阿哈達哈扎拉豐阿策楞等俱在一處皆係將軍乃四人內曾無一人同往卽或於參贊內派出亦當派諳練蒙古情形通曉蒙古言語之富德唐喀祿等若阿里衮不惟於蒙古地方不能諳練且不通曉蒙古言語乃令其與車布登扎布前往是誠何心是明知阿逆遠颺斷不能擒獲故令阿里衮一往以圖了事夫以朕所信用之將軍大臣乃如此行事朕實憤懣再達爾黨

阿聞被擄臺兵逃出告知阿逆在前伊並不竭力追擒及遇哈薩克兵時隊內忽有人來告阿逆見在此處阿布賚到時卽行擒獻之語達爾黨阿卽信而不疑不卽進兵久之賊眾分散始覺其詐追趕已屬無及設當遣人來告之時不爲所愚卽行進擊阿逆未必不可就縛何竟受人欺誑至此至哈達哈在後隊守護輜重營內報稱有賊人蹤迹哈達哈卽遣巴圖魯侍衛奇徹布往追據奇徹布報稱已見賊形卽催大隊兵丁前進而哈達哈並不星速前往遲久始進設彼時哈達哈能帶兵追及一同攻戰擒獲阿布賚亦可與哈薩克換取阿逆此又坐失事機之一端也在達爾黨阿哈達哈等兩次攻戰時朕亦非苛責其必能擒獲阿布賚與阿逆也但機有可乘而伊等才力不逮存心不堅以致屢失機宜朕竊惜之又伊等奏請在哈薩拉克地方過冬明年派兵一萬及馬匹

數萬駝隻數千等語伊等甯不知如許馬駝不能一時卽赴縱使
通行趨運而經歷長途能保其必不疲瘁而故爲此具奏耶蓋欲
表伊等並無撤兵之意第以所需軍行駝馬不能運送不得已而
撤兵與伊等毫無關涉耳伊等俱係朕加恩授爲將軍參贊之人
揆其伎倆卽能和衷共濟事之成否尙在未定似此不以國事爲
要懷私歧視各占地步又安望其奏功策楞玉保罪孽滿盈致干
天譴達爾黨阿哈達哈等此次遠赴哈薩克地方亦屬勤苦使伊
等協力辦理卽不能擒獲阿逆朕亦必酌量加恩乃各挾己私深
負委任茲以其行走之勞抵其應得之罪不另加譴責已屬朕格
外施恩將此通行曉諭中外知之○丙戌諭達爾黨阿不必協辦
大學士刑部尙書鄂彌達著協辦大學士事務○諭軍機大臣等
據成衮扎布奏貝勒車布登從前擅回遊牧及擒賊青滾雜卜時

又託病未往效力甚屬可惡請革去貝勒其應襲公爵亦不准伊子承襲等語事布登係喀爾喀舊人年亦老邁前曾著有勞績若按律治罪有所不忍著加恩免其鞫解來京治罪並免其革去貝勒至伊子齊旺多爾濟或尚可造就仍舊賞給公爵以觀後效○戊子定永遠枷號人犯冬令不准保釋例○己丑諭軍機大臣等土謝圖汗延丕勒多爾濟當眾喀爾喀擾亂之時既不督令扎薩克等效力伊子旺沁多爾濟復帶兵擅回游牧均應按律治罪第念延丕勒多爾濟年已衰邁前已將盟長副將軍革退著加恩仍留王爵旺沁多爾濟著革去台吉發往軍營效力○庚寅諭軍機大臣等據黃廷桂奏額敏和卓呈稱莽噶里克送到噶勒藏多爾濟印文令與尼瑪等同赴羅克倫商謀叛逆莽噶里克並未前往等語此不過因伊子白和卓未回謬爲恭順之詞未可輕信已令

傅魁領兵會同額敏和卓密商辦理仍舊傳諭傅魁俟見莽噶里克時卽諭知伊子見在肅州並未加罪伊或親赴肅州卽行拏解來京候朕辦理至噶勒藏多爾濟印文俟奏到時查勘圖記或係扎那噶爾布等捏造或實係噶勒藏多爾濟謀爲不軌立可查驗彼時另行降旨○壬辰巴里坤辦事大臣雅爾哈善等奏遵旨詳察沙克都爾曼濟情形見其向內設有卡座又屢遣人探聽巴里坤兵馬情形其屬人普爾普首伊與扎那噶爾布等潛通信息並令伊前赴巴里坤託病不至種種可疑顯有叛逆形迹隨於十二月十六日派兵至伊遊牧擒剿共斬賊眾四千餘人以杜後患其赴京支領俸餉之摩羅等尙未抵巴里坤已檄知沿途地方查拏所有博爾和津等應解往肅州或應解京又巴里坤地方尙有布庫努特得木齊多爾濟所屬戶口二百餘人應否送至察哈爾安

插俱候旨遵行諭軍機大臣等雅爾哈善等查出沙克都爾曼濟
背叛情形卽領兵前往擒剿辦理甚屬奮往雅爾哈善前已補授
內大臣此次著同李繩武錫特庫一併交部照軍功議敘丑達遇
有總兵缺出卽用其副將員缺卽著閆相師補授其餘效力官員
查明一體交部議敘博爾和津及摩羅等俱著解送來京多爾濟
等戶口俱照所奏送察哈爾安插又奏據額敏和卓之子素賚瑞
告知莽噶里克等謀叛情形卽應發兵應援復詳詢素賚瑞知莽
噶里克琿齊二人遊牧與魯克察克毗連兵力無多可以卽時擒
剿惟巴雅爾遊牧地方路徑稍險應先擒滅莽噶里克等再行辦
理臣卽派副將丑達參將閆相師等領兵一千名於十二月二十
四日起程前往魯克察克一切與額敏和卓相機辦理諭軍機大
臣等雅爾哈善等據素賚瑞告知賊人情形卽派兵前往應援額

敏和卓所辦甚合機宜昨傳諭令傅魁帶兵五百名前往今丑達等既帶兵一千名赴援更屬有益其傅魁所領兵丁應否仍行遣往聽雅爾哈善等酌量辦理丑達等會同額敏和卓辦理莽噶里克之後卽令駐紮吐魯番防守毋庸進剿巴雅爾儒巴雅爾領兵前來卽行奮力擒拏至此項兵丁大半皆係綠旗究之不宜深入卽使擒獲巴雅爾亦令伊等駐紮過冬一切事宜仍俟明春大兵前往辦理○大學士管陝甘總督黃廷桂奏安西綠營兵二千前往巴里坤共需馬四千七八百匹酌減每兵三名合給車一輛裝載軍械兵丁令從容步行以節馬力若節得一分馬力將來乘騎進剿卽可多得一分之用得旨甚合機宜嘉許之至筆不能宣○是歲朝鮮琉球暹羅來貢○會計天下民數數各省通共大小男婦一萬八千六百六十一萬五千五百一十四名口各省通共存

倉米穀三千一十九萬一千一百五十八石三斗三合六勺零